

**መጀልስ አምን ወለዛልም ቀራራቱ ድድ ኤረትሮፕ
(12ይ ክፈል)**



እብ ዶ/ር አሕመድ ሐሰን ድሕሊ

እግል መባጥር አሌሪክ በሊስ እግል ሂበት፡ ምን ሱዛን ራይስ ዲብ ደንጎበ ለቴለተ ንቅጠት አምበቶት ለሔሳ ቱ።

ሀ. ዲብ ረአስ ሸዑብ ኤረትሮፕ ለትከረ መእከይ፡ አሜሪካ ለዐበ ታሪካይ ወስያሲያይ መስኡልየት ክምሰል ትረፌዕ አሰልፍ ብህላሙ ዐልነ። ገሌ ምኑ ምን እንረኤ፡

- ሐቆ ካልአይ ሐርብ እዲነ፡ ሐቅ ተቅሪር መሲር ሸዑብ ኤረትሮፕ ኬደት። - ዲብ ሰነት 1962 እግል ፈደራልያይ ቀራር እንዴ ሸጥበት ኤረትሮፕ ምሰል አቶብየ ክምሰል ትትሐበር ወዴት።

- እግለ አቶብየ ድድ ሸዑብ ኤረትሮፕ ለተበዑቱ ናይ ደማር አርድ ስያሰት እንዴ አየደት ሰዴት ወዲብ ፍዕል አውዐለት።

- ንዳል ተሕሪር ሸዑብ ኤረትሮፕ ምሰል ክሉ እንሳንያይ መሻክሉ ዲብ ረአሱ ለጀረ ደማር ክምሰል ልትራየም ወዴት።

- ምን ሰነት 1989 አስክ ወክድ ሕርየት ታመት ኤረትሮፕ 1991፡ እብ ገበይ ርአስ አሜሪካ ለዐለ ጂሚ ካርተር ወሴድያይ ወዚር ካርጅየት ዲብ ቀድየት አፍሪቀ ሄርማን ኮሄን እንዴ ወዴት፡ ህድግ አትላንተ፡ ናይሮቢ ወለንደን ዲብ ትብል ሕርየት ኤረትሮፕ እግል ተዐንቅፍ ብዙሕ ጀርቤታት ወዴት።

- ክምሰልሁመ ዲብ ሰነት 2009 ኣብ ገበይ ምጀልስ አምን ድድ ኤረትሮፕ ኢዓድል ወኢቃኑናይ ቀራር ዕልብ 1907 ክምሰል ልትቀረር ወዴት። ክምሰል ልትአመር ኤለክትሪኖካይት ሸበከት ውክሊክስ ዲብ ዮም 29 ሰብተምበር 2009

ምን መክተብ ወኪሉት አሜሪካ ለዐለት ሱዛን ራይስ ለረክቦዩ ምስጢራይት ወሲቀት እንዴ አሸረ ዲብላ ነሽረቱ ሐብሬ፡ ለድድ ኤረትሮዩ ለሐልፊ ቀራር ምጅልስ አምን፡ አሜሪካ እብ ዋይዲብ ለወዴቱ ክምሰል ዐለ ፈደሐ። ራይስ እግል ረአይ ርኢስ ኡጋንደ ሞሰቪኒ እንዴ አሸረት፡ “ምጅልስ አምን እብ ድወል አፍሪቀ እግለ ቀርብ ወእብ እተሓድ አፍሪቀ ለትትአዩድ ቀድየት፡ ቀራር እግል ልትነሰእ እቱ ለልትቀደር እቡ ሽክ ክምሰል ይህለ ለሐልፊ ተጃርብ እኩዱ ቱ” እት ትብል ሸርሐት።

ቡርኪናፋሶ ወኡጋንደ እብ ሕበር ሐቆመ አቅረቢያሁ ብሪጣንዩ እግል ተአይዱ ክምተ ፈረንሰ ረአስ ክምሰል ተአደንን ወክምሰል ትትቃወም ሐበረት። ሱዛን ራይስ እንዴ አትሌት እግል ወዚር ሽኡን ካርጅየት ፈረንሰ ለዐለ ቤርናርድ ኮሽነር፡ እብ ገበይ ምጅልስ አምን ድድ ኤረትሮዩ ቀራር መኔዕ እግል ተአይድ እብ ቅሸሽ ሸቄት። እምበል እሊ፡ ሸበከት ውክሊክስ ዲብ ዮም 23 ዲሰምበር 2009 ዲብላ አፍገሪዩ ሚስጢራይ ወሳይቅ አሜሪካ ዲብ ረአስ ሰብ ሰልጠት ኤረትሮዩ መኔዕ እግል ቀረሮት አሜሪካ ለትወድዩ ጸገም ኮሽነር እግል ልሰዴ፡ ራይስ ሊክ ክምሰል ቀደመት እቱ እንዴ አሸረ፡ ኮሽነር ህዩ ዲብ ረአስ ኤረትሮዩ መኔዕ እግል ቀረሮት እግል ለአይድ ክምቱ፡ ምናተ እግለ ዲብ ሶማል ጽቡጣም ለህለው ውላድ ፈረንሰ እግል ዐተቆት ናይ ኤረትሮዩ ሰዳይት ሰበት ለትሐዝዩ፡ እግል ገሌ አውካድ እግል ልታኬ ክምቱ ክምሰል አከደ ፈደሐ። ውላድ ፈረንሰ አሲሪን እብ ሰዳይት ኤረትሮዩ ክምሰል ተዐተቀው ላኪን ፈረንሰ ዲብ ረአስ ኤረትሮዩ መኔዕ እግል ትቀርር እግል ትሻርክ ክምተ ሐበረት። እበአማን ለለዐይብ መዋዲት ፈረንሰ !! ክምሰል ልትአመር ደውለት ኤረትሮዩ ምን ፈረንሰ ረሰሚ ጠለብ ክምሰል ቀርብ እተ፡ ምን እንሳንያይ ደሚር እንዴ ትበገሰት እግል ውላድ ፈረንሰ አሲሪን እግል ዐተቆት ትጸገም ዐለት።

ምናተ ሕኩመት ፈረንሰ እግል ውዲት ሰኔት ኤረትሮዩ እብ ኢፋሉታይት ገበይ እንዴ አንተህዘተ፡ እግል እስትራተጅየት አሜሪካ ጀግሐት። እሊ ናይ አማን ታሪክ እሊ ምን ርኢስ ፍራንኪን ፍዝሸልት እንዴ አስተብዴክ አስክለ ማሌ ለዐለ ርኢስ በራክ ኦባመ ለዐለው እዳራት አሜሪካ ሰኒ እንዴ ወደው ለለአሙሩቶም። ሰበት እሊ፡ ሳብተት ወኪሉት አሜሪካ ሰፊረት ሱዛን ራይስ እት አርወሐተ እግል ትሰሐቅ ሐዜት ምንገብእ፡ እለ ለከስስ ቱ። ሐቃይቅ ታሪክ ባይን ሰበት ህለ ላኪን እግል አዜ ልግበእ ወእግል ምስተቅበል፡ እግል ዐቅል ናይለ ሐልፊው እዳራት አሜሪካ ለከስስ ተጃርብ ክምቱ ሸክ አለቡ። - ሰፊረት ሱዛን ራይስ ክምሰል ሳብተት ወኪሉት አሜሪካ ዲብ ምጅልስ አምን ሰበት ዐለት፡ ምጅልስ አምን ምን ናይ መንጠቀት አው ክፈል ዐለም መነዘመት ጠለብ ሰበት ቀርብ እተ ሌጠ፡ እብ አሳስ ምዕራፍ ሰቦ ሚሳቅ መነዘመት ምጅልስ ቅራን ዲብ ረአስለ ገብአት ትግበእ ነፈር ድወል ቀራር መኔዕ እግል ለሓልፍ ክምሰል ቀድር ሰኒ ወአማን ተአምር ዐለት።

እብ መባጥር ናይ ኣማን ወሓቂቀት ገዝ ለክለቡ ኣግቡይ ሌጠ ቀራር መኔዕ እግል ልክለፍ ክምሰል ወጅብ ለቀርር ማዳት ዕልብ 39: 41: 42 ቱ ለህለ። - ዲብለ ወክድ ለህይ እግል መንዘመት ውሕደት ኣፍሪቀ መሬሕ ለዐለት ሊብዩ፡ ድድለ ቀራር ሰወተት ሌጠ እንዴ ኢትገብእ፡ ዶር ኤረትርዮ እግል ልትህደግ እቡ ዲብ ኣጄንደትለ ዲብ ጃንዋሪ 2010 ለለክመሕብር ሙእተመር ሜርሐት እተሓድ ኣፍሪቀ ርትብት ዐለት፡ ሴምዓይ ኢረክበት ዲኢኮን እግል እተሓድ ኣፍሪቀ በክት እግል ልትህዩቡመ ጣልበት ዐለት። እብለ ገበይ እለ ልትረኤ እት ህላመ፡ ናይለ ወክድ ለህለይ እዳረት ኣሜሪካ እብ ገበይ ወኪለ ዲብ ምጅልስ ኣምን እንዴ ወዴት፡ “ቀራር መኔዕ ድድ ኤረትርዮ እብ በዳሪት እተሓድ ኣፍሪቀ ለመጽሓቱ” ብሂል ምን ኣማን ለሬማ ቱ። ዝያደት ህዩ እግል ሙእተመር እተሓድ ኣፍሪቀ ለዐንቀፈ ቀራርቱ። - ቀራር መኔዕ ክምሰል ሐልፈ ሐቆ ሐቴ ኣምዕል፡ ለምን ድወል ኣፍሪቀ 28 ነፈር ለትክምክም መንዘመት ተጀሚዕ ሳሕል-ሰሕረ፡ ዲብ ዮም 24 ዲሰምበር 2009 ዲብለ ኣፍገረቱ ሸሬሕ፡ እግል ቀራር ምጅልስ ኣምን ሰቀት።

ዲብ ሸርሑ ህዩ መሻክል እብ ንቃሽ ክምሰል ልትፈተሕ፡ መኔዕ መሻክል እግል ለኦርሄ ራቴዕ ሕርያን ክምሰል ኢኮን፡ ኤረትርያመ እብ ሰበትለ ዲብ ቀራር ዕልብ 1907 ህዱግ ለህለ ቅደይ እግል ህዲግ ዱሊት ክምሰል ዐለት ወደሐ።

- ወኪለት ኣሜሪካ፡ ቀራር ምጅልስ ኣምን ዕልብ 1907 እብ ሸፋግ ኣው እብ ድመል ለትቀረረ ክምሰል ኢኮን ሸርሐት። እለ መክሐደ እለ ሳኪን እብ ፍዕለ በሊስ ረክበ። ሰበቡ፡ ለኤረትርዮ ትትሸኼ እበ ሐሰት ባይነት ዲብ ሙእተመር እተሓድ ኣፍሪቀ እግል ኢልትህደግ እበ ዐንቀፈተ። እበ ዎሮ እንክር ህዩ ቀራር ዕልብ 1907 ዲብ ዮም 23 ዲሰምበር 2009 እግል ልትቀረር፡ ጨቅጥ ወዴት። ለህደፍ ህዩ፡ እብ መናሰበት ሰነት ሐዳስ ኣው በዓል ልደት ክምሰል ገብእ እግል ልግበእ፡ ክምሰል ክሉ ዲብለ ሐልፈ ስስ ዕቁዳት እብ እዳራት ኣሜሪካ ለገብኦ፡ እግል ሸዑብ ኤረትርዮ ለትሰመመ ህያብ እግል ተህቡ ሰበት ሐዜት ሌጠ እንዴ ኢገብእ፡ ሙእተመር ሜርሐት እተሓድ ኣፍሪቀ እግል ቀድየት እግል ኢልህደግ እተ በክት እግል ክልኣትማቱ ለዐለ።

ለቀራር ኣሜሪካ እግል ርመጭ ለዐለ ዐሽመ ለፈድሕ እት ረክስ ግብኣቱ፡ እበ ብዕድ እንክር ህዩ ድድ ኤረትርዮ እግል ዐለ ናይ ኣሜሪካ ናይ ጳብኢት ደሚር ለለርኤቱ ለዐለ።

- ትሉሉይ ኣንዘመት እዳራት ኣሜሪካ፡ ምን ርኢስ ጅርጅ ቡሽ ዲብ ሰነት 1992 እንዴ ኣስተብደው “በሊስ ሰእየት” እበ ልብል ኣርእስ ዲብ ተማስ ሶማል ምን ልትወሐሎ ምን ብዕዳም ወለዐል ሱዳን ራይስ ሰኒ ወኣማን ተኣምሩ ዐለት። ኣሜሪካ ዲብ ሰነት 1994 እንዴ ትፈለለት ምን ሶማል ክምሰል ፈግረትመ፡ ሰሓፈት

ኒውዮርክ ታይምስ ዲብ ናይ ዮም 7 ጁን 2006 ጥብብ ክምሰል ሓበረቱ፡ ናይለ ወክድ ለህይ እዳረት አሜሪካ እብ ገበይ መክተብ ስለላህ (ሲ.አይ. ኤ.) እንዴ ወዴት እግል መናቢት ሓርብ ሶማል “ገለድ አከዶት ሰላም ወጋብሆት እርሃብ” እብ ትብል ስቅራት እት ትደርብ ወትሰልሕ ትረኤት። እሊ ለትበሀለ ክሉ ክምሰል ኢትሰርገለ እለ ህዬ፡ እብ ገበይ ናይለ ወክድ ለህይ ንዛም አቶብዮ፡ እት ሰነት 2006 ዲብ ሶማል ወራር ጀረ። ሰበት እሊ ናይለ ወክድ ለህይ እዳረት አሜሪካ ዲብ ሓባለኮት መሻክል ሶማል ለዐቤት መስኩልየትተ ለረፍዐት። ናይለ ወክድ ለህይ እዳረት አሜሪካ እብ ገበይ ምጅልስ አምን እንዴ ወዴት እግል ኤረትርዮ አረይ ናይለ ክሉ ለአጅሬቱ ጀራይም ሰበት ጀረበትመ መስኩልየት ለትረፌዕ ቱ።

3. ብሪጣንዮ

ብሪጣንዮ እግል ቀራር ዕልብ 1907 ዲብ አዳላይ ወቀረሮት ዶር ዛይድ ተልሄት። ወኪለ ዲብ ምጅልስ አምን ሰፊር ማርክ ልዎን ግራንት፡ እግል መባጥር ዐዱ እብ ክእነ ለተሌ ሸርሐዮ።

1. “ዮም ብሪጣንዮ እግል ቀራር ዕልብ 1907 ናይ 2009 እንዴ አየደት ስውትት ህሌት። እግል እሊ መባጥር እሊ ለነሰአት እቡ ሰበብ ህዬ ኤረትርዮ እግል ቀራራት ምጅልስ አምን ዲብ ቀድየት ሶማል ወጅቡቲ እብ ትሉሉይ ሰበት ትከይድ ቱ።”
2. “ እሊ ቀራር እሊ፡ ናይ መንጠቀት መነዘማት እተሓድ አፍሪቀ ወኢናይ ሕኩመት መአሰሰት ዐማር ኢጋድ እብ አቅረበዉ ጠለብቱ ለገብአ።”
3. “ኤረትርዮ እግል ሙስልሒን መትቃውመት ሶማል ክምሰል ትሳዴመ ‘መራቅባይ ሓሽም ሶማል’ እግል ምጅልስ አምን እስባት አቅረበት እቱ።”
4. “ለጄሽ ዲብ ሶማል ብቆት ትሳድፉ ለህሌት አጋንደ፡ ዲብ እሊ ቀራር እሊ እግል ብጽሐት እግል ወዴቱ ጸገም እግል ሓመዶት።”
5. “ምጅልስ አምን እግል እሊ ቀራር እሊ ሓቆለ ነሰአት፡ ሕኩመት ኤረትርዮ ምነ ነሰኡ ለዐለት ኢቃኑናይ መዋዲት እግል ልብጠር ንትላኬ። 61